

estre les tout-puissans & precieux en terre, voila la punition dont vous auez douté: Les gens de bien seront dans des lieux delicieux, dans des iardins ornez de fontaines, ils seront vestus de pourpre, ils se verront tous en face, nous les assemblerons avec des femmes pures & nettes, qui auront les yeux tres-beaux, ils auront des fruiets delicieux & sauoureux de toute saison, ils n'y mourront iamais, & seront deliurez des tourmens de l'Enfer par la grace speciale de ton Seigneur, voila la suprême felicité. Certainement nous auons enuoyé l'Alcoran en ta langue, peut-estre que les Arabes le comprendront, ils souhaitent ta ruyné, mais perseuere & attens le temps de la punition de leurs crimes.

*LE CHAPITRE DE LA GEN-
flexion, contenant cinquante-neuf versets,
escrit à la Meque.*

AV nom de Dieu clement & misericordieux. Dieu est tres-Prudent & Sage. Ce liure est enuoyé par le tout-Puissant & Sage. Les Cieux & la Terre sont signes tres-certains de son vnité à ceux qui croyent en sa loy, vostre creation & la creation de tous les animaux sont marques de sa grandeur à ceux qui ont sa crainte deuant les yeux, la difference de la nuit & du iour, la pluye qu'il enuoye du Ciel pour faire produire à la terre les fruiets, & pour la ref-

susciter apres sa mort, & la diuersité des vents, sont
 signes de sa toute-Puissance à ceux qui le sçauent
 comprendre. Je te raconte les merueilles de Dieu
 avec verité, enquoy croiront les infidelles s'ils ne
 croient pas en la parole de sa diuine Majesté. Mal-
 heur est sur ceux qui escoutent les commandemens
 de Dieu & deuiennent orgueilleux comme s'ils ne
 les auoiét pas ouïs; Presche a telles gens qu'ils souf-
 friront les rigueurs des peines infinies; Ils se mo-
 quent de la foy quand on leur en parle; Certaine-
 ment ils seront chastiez dedans le feu d'Enfer, leurs
 richesses ne les pourront pas sauuer, ny les Idoles
 qu'ils adorent, ils seront eternellement damnez.
 Celiure conduit le peuple au chemin de salut, ceux
 qui ne croiront pas en la loy de Dieu ressentiront
 les effets de sa colere, il a créé les mers qui portent
 les nauires pour l'aduantage de vostre commerce,
 peut-estre que vous serez recognoissans de cette
 grace, il a créé pour vous tout ce qui est au Ciel & en
 la terre, c'est vn signe de sa bonté à ceux qui le con-
 siderent. Dis à ceux qui croient en la loy de salut,
 qu'ils pardonnent à ceux qui n'ont pas la crainte
 de Dieu deuant les yeux, Dieu les chastiera selon
 leurs demerites, qui bien fera bien trouuera, & se-
 rez assemblez deuant sa diuine Majesté pour estre
 iugez. Certainement nous auons enseigné l'escrit-
 ture & nos commandemens aux enfans d'Israël,
 nous leur auons enseigné la science, & donné la gra-
 ce de Prophetie; nous les auons enrichis de toute

sorte de biens, & les auons preferés à tout le monde, Nous leur auons enseigné nostre loy, personne n'a disputé contre nos cōmandemens que ceux qui en auoient la cognoissance, & ce par enuie qui est arri- uée entr'eux, mais ton Seigneur iugera leurs diffé- rens au iour du Iugement. Nous t'auons enseigné nostre loy, obserue-la, & ne suis pas les appetits des ignorans, ils ne te pourront pas deliurer des peines eternelles. Les infidelles obeissent les vns aux au- tres & les vray-croyans obeissent à Dieu. Ce liure est la lumiere du monde, il conduit au chemin de salut & à la misericorde de Dieu ceux qui croient en sa diuine Majesté. Les meschans pensent ils estre traitez comme les bons en leur vie & en leur mort, & qu'ils ne seront pas iugez? Dieu a créé le Ciel & la Terre pour marque de sa puissance, il iugera cha- cun selon ses œuures, & ne fera injustice à personne. Considere comme ils adorent ce qui leur vient en fantaisie, Dieu les a deuoyé de sa certaine science, il les a rendus sourds, il a endurcy leur cœur, & les a auuglez; qui les conduira si Dieu les deuoye? ne le considerent ils pas? Ils disent, nostre resurre- ction sera semblable à la vie de ce monde, les vns meurent, les autres naissent, les longues années nous font mourir, ils ne sçauent pas ce qu'ils disent, & ne parlét que par opinion; lors qu'on les presche, ils n'ont autre discours à dire, sinon, faits ressusci- ter nos peres si ce que vous dites est veritable. Dis leur, Dieu vous fait viure & mourir, & vous assem-

bleta au iour du Iugement, il n'y a pas de doute en cela; mais la plus grande partie du peuple ne le cognoit pas. Dieu est Roy des Cieux & de la Terre, & du iour du Iugement, ce iour il assemblera les infidelles, tu verras toutes les sectes, & toutes les Religions assemblées deuant luy sur leurs genouils, chaque secte verra ses pechez escrits dans vn liure particulier, & tous seront chastiez selon leurs demerites; On leur dira, voila ce liure qui parle contre vous, nous auons exactement escrit ce que vous auez fait, Dieu donnera sa misericorde aux gens de bien, c'est la suprême felicité. On dira aux impies, ne vous a-t'on pas presché les commandemens de Dieu: Vous vous estes enorgueillis, & auez esté incredules quand on vous a dit que les promesses de Dieu & que le iour du Iugement estoient indubitables, vous auez dit que ce n'estoit qu'une opinion, & que vous ne le croyez pas; A la fin, ils recognoistront leur peché, & ressentiront les peines qu'ils ont mesprisées, Dieu leur dira au iour du Iugement. Le vous ay aujourd'huy oublié comme vous auez oublié la rencontre de cette iournée, le feu d'Enfer sera vostre habitation, personne ne vous en deliurera, parce que vous vous estes moqués de maloy, & vous estes enorgueillis des biens de la terre: Ils ne sortiront iamais de ce brasier, & ne se pourront pas conuertir. Louange est deüe à Dieu Seigneur des Cieux & de la Terre, gloire luy est deüe en tout lieu, il est tout-Puissant & Sage.